

Transkription von Urkunde HST 1369a

Ort, Datierung: Stralsund, 1369-03-28

Signatur: Stadtarchiv Hansestadt Stralsund, StU 0447 [online]

Inhalt: Rat der Stadt Stralsund: Rentenverkauf

Bemerkung: anderes Datum: 29.03.1369

Wy borghermestere vnde ratmanne Der stad Thome stralessunde also h(er)man va(n)me rode hinr(ik) / schele bertram wlfam johan wreen johan rughe ludeke van Cûlpen hin[rich] crûdener h(er)ma(n) / van Dorpen albrecht broyeland . herman rÿbe Thideman van büren borch[ar]d plotze wolt(er) / van Osenbrügge . borchard van santebur ludeke ghÿse gherd lowe johan yordens . Jacob / grisenbergh Engelke van Daluitze johan grisenbergh Conrad witte Jacob swertsliper / Thideman van vnna . he(n)nyngh valke clay rockart Thideman crûdener johan van der heyde / albrecht ghildehus . arnt van zost vn(de) gregorius swertyng bekennen vnde betûghe(n) ope(n)bare / yn desser scrift Dat wi hebbe(n) vercoft redeliken vnde rechtliken mit eyner meenen / endracht vnde mit beradenen mō(de) hern albrechte traelman eyname ratma(n)ne tho / lûbeke vnde sÿnen rechten erfnamen vn(de) nauolgheren viif vnde seuentigh mark gheldes / vnser mûnte Dese vorbenomede(n) viif vnde seuentigh mark gheldes schole wi vt gheuen to / twen thyden yewelkes yares hern albrechte traelman efte sÿnen rechten erfname(n) efte / eren rechten boden weme se dat beuelen vp tobørende bynnen vser stad thome sunde / also uppe sÿnte michels dagh achte vnde drûchtighestealue mark vnde to pasche(n) achte / vnde drûchtighestealue mark sunder yenegherleye hinder vnbeworen Dese vorbenome=/den viif vnde seuentigh mark gheldes hebbe wi dem vorben(omeden) hern albrechte traelma(n) vn(de) / sÿnen rechten erfnamen vercoft vor neghenhundert mark vnser pe(n)nynge De wi vntfange(n) / hebben vnde an vnser stad nûd ghekeret hebben vnde desser ÿarlikes renthe schal vry we=/sen vor scholt vnde allerleye vnghelt vnde denest vnser stad to donde Vortmer so verbin=/de wi vns in desseme breue Dat wi desse vorbenomeden rente scholen vtgheue(n) vnbewōre(n) / also vorscheuen steÿt sunder hinder yeneghes orloghes efte hinder ÿeneghes personen , / he sy gheystlik edder werlik Vortmer were Dat wi desse renthe vorben(omede) nicht vtgheue(n) / vppe de thid vorben(omeden) wat schaden de vorben(omede) her albrecht traelman vnde syne erfname(n) / Dar af nemen Den schole wi en vprichten Vortmer so hebben vns her albrecht trael=/man vorbenomet vnde syne erfnamen ghegheuen den wedderkoop Desser renthe vorben(omede) / Der vrûntschop willen De se mit vns hebben Dat wi desse vorscheue(n) viif vn(de) seuentigh / mark gheldes moghen wedder kopen wan wi willen vor neghenhundert mark sundescher / mûnte Vnde wanne wi des willen hebbe(n) so schole wi hern albrechte traelman efte / sÿnen rechten erfnamen vorscheuen tho segghen een half yar thovoren vnde gheuen en / ere neghenhundert mark vōrben(omeden) mit der renthe also id syk denne bōret . also tho / sÿnte michels daghe edder tho paschen vorben(omede) an ene betûghnisse vn(de) bekantnisse / Desser stûcke de vōrs(creuen) stan so hebbe wi vnser stades grote Ingheseghel mit vnser rechte(n) / witschop vor dessen bref ghehanghen De ghescreuen is in der stad thome sunde Na / ghodes bort dusend yar drehundert yar in deme neghe(n)vnde sostighesten iare Des / midwekens vor paschen